

# TEZAU LITURGIC

11 IULIE

# ACATISTUL SF. CNEAGHINE OLGA-ELENA DE LA KIEV II



MOSCOVA, 2000



# **Акафист святых равноапостольных Велицей Княгине Российской Ольге**

## **Кондак 1**

Избранней от земли Русския угоднице Божией, скорой помощнице и наставнице нашей похвальная воспеваем ти, святая равноапостольная ольго, яко заре во тьме идолопоклонения светом веры возсиявшей и путь ко Христу всем людем страны твоея показавшей. Ты же, яко имущая дерзновение к прославленному ты Господу, ограждай нас от всяких бед молитвами твоими, да зовем ти: Радуйся, святая равноапостольная княгине Ольго богомудрая, свет веры православных народу твоему предвозвестившая.

## **Икос 1**

Ангелов и человеков Творец, времена и лета во Своей власти положивый и судьбы царств и народов по Своей воли управляяй, егда восхоте Русь святым крещением просветити, призва ты, святая равноапостольная Ольго, к познанию Бога истиннаго, да будеши всем людем русским образ благочестия и наставница в вере

Христове. Мы же, промыслу Божию о тебе  
явленному дивящися, восхваляем тя сице:  
Радуйся, на просвещение земли Русския  
предызбранная;  
радуйся, пророчества святаго апостола Андрея  
Первозванного исполнительнице.  
Радуйся, Богом данная державы Российския  
покровительнице;  
радуйся, отечества твоего от нашествий  
вражиих мужественная защитнице.  
Радуйся, града Пскова светлое радование;  
радуйся, града Киева похвало и утверждение.  
Радуйся, первоучительнице и просветительнице  
наша;  
радуйся, яко тобою познахом поклоняться в  
Троице Творцу.  
Радуйся, яко тебе ради Пресвятое имя Господне  
от всех верных земли нашея прославляется;  
радуйся, яко и твое имя вкупе с  
равноапостольным Владимиром повсюду  
восхваляется.  
Радуйся, страны нашея Российския духовное  
сокровище;  
радуйся, всея Христовы Церкви преславное  
украшение.  
Радуйся, святая равноапостольная княгине  
Ольго богомудрая, свет веры православныя  
народу твоему предвозвестившая.

## **Кондак 2**

Видим тя, святая ольго, яко крин в тернии прозябший: ты бо аще и в роде язычеством рождена еси, обаче закон Божий в сердце твоём написан всегда имела еси и целомудрие твоё яко зеницу ока блюла еси. Мы же, взирающе на добродетели твоя, душею и сердцем радуемся и прославльшему тя Христу Богу поем: Аллилуиа.

## **Икос 2**

Разум небесный даровася тебе, Ольго богомудрая, имже добре уразумела еси, яко идоли, рукама человеческими сотвореннии, не суть бози; темже отвергши идолослужение, потщалася еси познати Бога истиннаго. Сего ради, таковой мудрости твоей дивящися, вопием ти сице:

Радуйся, мудрая жено, тщету идолопоклонения уразумевшая;

радуйся, истиннаго богопознания и правья веры усердно искавшая.

Радуйся, прежде разумения закона Божия по закону совести праведно пожившая;

радуйся, прежде приятия христианския веры дела, христианом подобающая, творившая.

Радуйся, чистоты душевныя и телесныя хранительнице;

радуйся, супружнице добрая и верная.

Радуйся, много душею за сына своего

Святослава болевшая;  
радуйся, во вдовстве твоём целомудренное  
строгое житие проводившая.  
Радуйся, Российския державы мудрая  
правительнице;  
радуйся, во отечестве твоём суды праведны  
творившая.  
Радуйся, мудрецов мира сего мудрейшая;  
радуйся, жен российских красото.  
Радуйся, святая равноапостольная княгине  
Ольго богомудрая, свет веры православныя  
народу твоёму предвозвестившая.

### **Кондак 3**

Силою благодати Божией наставляема,  
потщалася еси, богомудрая Ольго, достигнути  
Царьграда, идеже зрящи красоту церковнаго  
благолепия и послушаючи учения словес  
Божественных, восприяла еси всем сердцем  
твоим любовь Христову, благодарственно  
вопиючи Ему: Аллилуиа.

### **Икос 3**

Имуще сердце яко добрую землю, удобь  
восприяла еси, Ольго блаженная, семя святыя  
веры, познавши Христа Бога истиннаго. Темже  
святое крещение прияла еси от руку Патриарха  
Царьграда, иже и предрече ти, яко отныне  
ублажат тя вси народи страны твоея. Мы же

ведуще тя, яко благовестницу Церкви Русския,  
едиными усты и едином сердцем взываем сице:  
Радуйся, дивным Промыслом Божиим к вере  
истинней приведенная;  
радуйся, от Христа свыше просвещенная.  
Радуйся, во святем крещении Богу Отцу  
усыновленная;  
радуйся, во святем причащении Богу Сыну  
соединившаяся.  
Радуйся, Духом Святым умудренная во  
спасение;  
радуйся, миром благодатным запечатленная.  
Радуйся, яко дар премудрости и разума прияла  
еси в миропомазании;  
радуйся, яко утвердися в тебе дух совета и  
крепости.  
Радуйся, умом Христовым обогатившаяся;  
радуйся, призванная на подвиг духовный.  
Радуйся, от купели крещения возрожденная;  
радуйся, жизнь благодатную во Христе  
стяжавшая.  
Радуйся, святая равноапостольная княгине  
Ольго богомудрая, свет веры православныя  
народу твоему предвозвестившая.

#### **Кондак 4**

Буря недоумений не смуди душу твою, Ольго  
премудрая, еще не крещену сущу: како  
возможеша оставити веру отцов твоих. Бог же

Промышлением Своим приведе тя к  
возрождению водою и духом, да в чистоте  
сердца посреде языческа Руси воспеваеши Ему  
ангельскую песнь: Аллилуиа.

#### **Икос 4**

Слышавши от крестившаго тя Патриарха  
напутственное слово о чистоте, посте, молитве и  
о всех добродетелех, христианом подобающих,  
слагала еси глаголы его в сердца твоем, и дела  
вся наставления сия исполняти обещала еси. Тем  
же убо услыши от нас, любящих тя, похвальное  
пение сицевое:

Радуйся, единого Христа всем сердцем  
возлюбившая;  
радуйся, любви и сострадания к людем  
исполненная.

Радуйся, на непоколебимом камени заповедей  
Христовых утвержденная;  
радуйся, добродетелей светильниче неугасимый.

Радуйся, храмы Божии и божественную службу  
возлюбившая;

Радуйся, воздержанием и молитвою Богу  
угодившая.

Радуйся, сердце твое от терния душевредных  
страстей очистившая;

радуйся, слезами покаяния ю оросившая.

Радуйся, яко просвещение земли Русския светом  
Христового учения провидела еси.

радуйся, множество душ к пению славы Господа твоего призвавшая.

Радуйся, путь ко спасению познавшая;  
радуйся, яко житием и подвиги твоими путь сей и нам указуеши.

Радуйся, святая равноапостольная княгине Ольго богомудрая, свет веры православных народу твоему предвозвестившая.

### **Кондак 5**

Боготканною одеждою святого крещения облекшись и нетленною пищею Пречистаго Тела и Крове Христовы духовно укрепившись, Ольго преблаженная, возжелела еси языческое нечестие во отечестве твоём разрушити и в сердцах людей русских истинную веру насадити, единым бо желанием горела еси, да приведеша всех ко Христу и научиши вкупе с тобою воспевати Ему: Аллилуиа.

### **Икос 5**

Видевши, святая Ольго, вся люди земли Русския во тьме идолослужения пребывавшия, усердно потщалася еси светом Христовы веры тех озарити и сотворити наследники Царствия Небеснаго. Поминающе убо ревность твою по вере и любовь к чадам твоим, радостно взываем ти:

Радуйся, княгине святая, на земли благочестно

царствовавшая;

радуйся, провозвестнице веры истинныя в земли Русстей.

Радуйся, тьму языческую дерзновенно обличившая;

радуйся, единому Христу послужити возжелевшая.

Радуйся, равноапостольная просветительнице страны нашея;

радуйся, ищущим пути ко спасению наставнице благодатная.

Радуйся, первой христианстей царице Елене в ревности божественней подражавшая;

радуйся, яко имя ея во святем крещении прияла еси.

Радуйся, честный крест Христов и святыя иконы из Царьграда во град Киев принесшая;

радуйся, яко иереи и клирики с собою на Русь привела еси.

Радуйся, премудрость и благодать Божию нам открывающая;

радуйся, материнскою любовью нас согревающая.

Радуйся, святая равноапостольная княгине Ольго богомудрая, свет веры православныя народу твоему предвозвестившая.

## **Кондак 6**

Проповедником духоносным, апостолом, подражавши, Ольго богомудрая, обходила еси грады и веси державы твоея, приводящи люди к вере Христовей, во благочестии их утверждаючи и научаючи воспевати Единому в Троице славимому Богу: Аллилуиа.

## **Икос 6**

Возсия свет благодати и милости Божия, егда утверждаючи в державе твоей основания веры христианския, воздвигла еси, Ольго блаженная, храмы Божии в матери градов русских Кieve и в стране рождения твоего, при реце Велицей у града Пскова. И тако начаша людие русстии прославляти повсюду Христа Бога нашего, тебе же, просветительницу свою, восхваляя сице: Радуйся, Богом дарованная на просвещение язычников;

радуйся, веры Христовы благодатная проповеднице.

Радуйся, в стране твоей идольскаго служения искоренительнице;

радуйся, яко многия русския люди к познанию истиннаго Бога привела еси.

Радуйся, с проповедию Евангелия землю Русскую обходившая;

радуйся, силою Божиею и благодатию укрепляемая.

Радуйся, на местех проповеди твоея честныя кресты водрузившая;  
радуйся, яко от них многая знамения и чудеса силою Божиею содевахуся.

Радуйся, светильниче Божия благодати, в земли нашей возжженный;

радуйся, православныя веры насадительнице.

Радуйся, словеса жизни вечныя людем твоим провещавшая;

радуйся, Христова учения славная благовестительнице.

Радуйся, святая равноапостольная княгине Ольго богомудрая, свет веры православныя народу твоему предвозвестившая.

### **Кондак 7**

Хотя привести народ русский к вере истинней, Ольго всеславная, явилася еси ему наставница богомудрая, и мнози жители Киева дивящеся о глаголах твоих, ихже никтоже прежде слыша, приимаху из уст твоих слово Божие и божественным крещением просвещахуся. Тем же убо вси новопросвещеннии людие, видяще велия труды и добродетели твоя, прославляху Отца Небеснаго, вопиюще Ему: Аллилуиа.

### **Икос 7**

Новое знамение благоволения Своего яви тебе Господь, егда, во образ Пресвятыя Троицы, три

пресветлых луча с небесе озариша место дубравное, ихже не точию едина ты зрела еси, но и вси сущии тамо людие видеша, и вкупе с тобою прославиша Триединого Бога. Мы же, ведуще сбытие проречения твоего о создании на месте оном храма Живоначальныя Троицы, ублажаем тя сице:

Радуйся, великая Божия угоднице, дара пророчества сподобившаяся;  
радуйся, Трисияннаго Небеснаго света зрительнице.

Радуйся, храм чудный во имя Святыя Троицы создавшая;

радуйся, и себе храм одушевленный Триипостасному Богу сотворившая.

Радуйся, яко в храмах, тобою созданных, хвала Святей Троице воспевается;

радуйся, яко тобою имя Божие в нашей стране прославляется.

Радуйся, воли Божия о просвещении народа русскаго первая исполнительнице;

радуйся, спасительных благ земных и небесных подательнице.

Радуйся, всея Российския страны заступнице и покровительнице;

радуйся, яко изволением Божиим держава Российская от моря до моря распространися.

Радуйся, людем страны твоея истинную любовь

показавшая;  
радуйся, житием твоим Бога прославившая.  
Радуйся, святая равноапостольная княгине  
Ольго богомудрая, свет веры православных  
народу твоему предвозвестившая.

### **Кондак 8**

Странствия земного течения скончаваючи,  
тепле Господа молила еси, Ольго блаженная, да  
не оставит Он люди русские по преставлении  
твоем во тьме идолослужения пребывать, но да  
положит им на сердце обратиться к Богу  
истинному и до скончания века воспевати Ему  
хвалебную песнь: Аллилуиа.

### **Икос 8**

Вся объята бывши благодатию Божественною,  
достохвальная Ольго, мысленными очесы зрела  
еси просвещение всего народа твоего и  
пророчески предрекла еси, яко мнози угодницы  
Божии, яко звезды светлыя, в земли Русстей  
возсияют, еже и сбытся изволением и  
благодатию Всемогущаго Бога. Сего ради,  
любовию побуждаеми, воспеваем ти сице:  
Радуйся, духовная наша мати, испросившая у  
Бога просвещение праотцем нашим;  
радуйся, яко по проречению твоему, мнози  
святии от рода нашего возсияша;  
Радуйся, молитвами твоими в скорбех и

напастех нас заступающая;  
радуйся, во обстояниих злых отечество наше  
сохраняющая и от врагов избавляющая.  
Радуйся, града Пскова основательнице;  
радуйся, дома Живоначальныя Троицы в нем  
устроительнице.  
Радуйся, благоволением Пресвятыя Троицы  
осененная;  
радуйся, волею благое иго Христово понесшая.  
Радуйся, Пресвятыя Владычицы Богородицы  
усердная почитательнице;  
радуйся, голубице чистая и непорочная сердцем.  
Радуйся, ты бо яко солнце новое освещаеши  
державу Российскую;  
радуйся, яко имя твое с любовью во всей стране  
нашей воспевается.  
Радуйся, святая равноапостольная княгине  
Ольго богомудрая, свет веры православныя  
народу твоему предвозвестившая.

### **Кондак 9**

Всяких добродетелей исполнена бывши, Ольго  
блаженная, с молитвою на устех предала еси дух  
твой в руке Христа Бога нашего, иже всели тя в  
Небесныя обители и первую от верных земли  
нашея сопричте лику равноапостольных  
угодников Своих. Темже испроси и нам у  
Господа мирную христианскую кончину, да

предадим души наша в руке Божии, поюще хвалебную песнь: Аллилуиа.

## **Икос 9**

Ветии многовещаннии не могут достойно восхвалити тя, Ольго богомудрая: како ты, ни ким же от человек учима и увещеваема, правую веру взыскала еси и познала еси Христа Бога нашего, Егоже лицезрения на Небеси наслаждаеши ныне. Темже, о мати наша, не забуди нас, страстьми омраченных и о благах вечных забывающих, да тобою на путь правый наставляеми, взываем ти радостно:

Радуйся, душу твою в руке Господа мирно предавшая;

радуйся, угоднице Божия, от земли во обители Небесныя водворившаяся.

Радуйся, с горящим светильником в радость Господа вшедшая;

радуйся, яко светом небесным житие наше озаряеши.

Радуйся, сосуде избранный, источающий небесное благоухание;

радуйся, яко с небесных высот на мольбы наша призираеши.

Радуйся, в селениях праведных ныне ликовствующая;

радуйся, яко и по преставлении твоём присно с нами пребываеши.

Радуйся, яко о всех чтущих тя Господа Иисуса Христа умилоствляеши;  
радуйся, яко и Препоблагословенную Матерь Его ходатайствовати о нас грешных преклоняеши.  
Радуйся, всесветлаго лика святых жен российских первоначальнице;  
радуйся, яко житие твое вси вернии немолчно воспевают.

Радуйся, святая равноапостольная княгине Ольго богомудрая, свет веры православныя народу твоему предвозвестившая.

### **Кондак 10**

Спасение людем страны твоея устрояя и мольбу твою исполняя, Всеблагий Господь избра внука твоего Владимира и чрез него возрадив всеянное тобою семя веры, всю землю Российскую просвети святым крещением. Тем же убо прославляем тя, Ольго блаженная, яко виновницу озарения народа нашего светом божественныя веры и благодарственно воспеваем Христу Спасителю нашему: Аллилуиа.

### **Икос 10**

Стена и ограждение всем верным явишася нетленныя мощи твоя, чуднаго благоухания исполненныя, ихже внук твой Владимир от земли подъяв, Ольго препоблаженная, со святителем Леонтием и множеством народа

постави во граде Киеве, в церкви Пречистыя Богоматере, и оттоле начаша источатися благодатная исцеления всем с верою и любовью приходящим к ним. Сего ради от всех концев земли Русския чада Церкви стекающеся, благодарение приносят Богу, воспевающе ти тако:

Радуйся, нетлением мощей твоих от Бога возвеличенная;

радуйся, благоуханием их люди русския усладившая.

Радуйся, явлением мощей твоих Церковь Русскую духовно возвеселившая;

радуйся, прославлением сим внука твоего Владимира зело обрадовавшая.

Радуйся, вечную радость на Небеси обретшая;

радуйся, яко и нас той радости научаеши.

Радуйся, окамененная сердца наша во умиление приводящая;

радуйся, покой душам нашим подающая.

Радуйся, богоблагодатная женам и девам помощнице;

радуйся, от враг видимых и невидимых нас ограждающая.

Радуйся, мати благосердая, от праведнаго гнева Божия нас укрывающая;

радуйся, стено и заступление всех почитающих тя.

Радуйся, святая равноапостольная княгине Ольго богомудрая, свет веры православныя народу твоему предвозвестившая.

### **Кондак 11**

Пение умиленное приносим ти, угоднице Божия, и смиренно молим тя: моли о нас Единого Человеколюбца Бога, да не отвратит лица Своего от нас, недостойных и грешных, но, яко Отец чадолюбивый, да спасет и помилует нас, да избавльшися вечнаго мучения, сподобимся с тобою в райских обителях воспевати Ему победную песнь: Аллилуиа.

### **Икос 11**

Светом трисиянным осияваема, со всеми святыми предстоиши ныне на Небеси Престолу Царя царствующих, Ольго всеблаженная, и яко светозарное светило, вся грады и веси страны нашея просвещаеши, разгоняючи мрак заблуждений, показуюци путь к истинному просвещению и Небесному блаженству ведущий, и молитвами твоими ограждаеши всех верных, любящих тя и вопиющих ти таковая:

Радуйся, Сыном Божиим из тьмы в благодатный свет призванная;

радуйся, звездо света Христова в стране нашей.

Радуйся, пред Престолом Божиим лампадо неугасимая;

радуйся, свеще, на свещнице Церкви Русския поставленная.

Радуйся, светильниче духовный, освещающий людем путь спасения;

радуйся, яко светом боговедения просвещаеши омраченныя умы.

Радуйся, плодоносное древо, питающее алчущих жизни вечныя;

радуйся, роса благодатная, орошающая и веселящая наша сердца.

Радуйся, чаше, источающая нам елей милости Божия;

радуйся, о нас грешных Судии Праведнаго умоление.

Радуйся, лилие прекрасная, услаждающая души наша;

радуйся, о мире всего мира молитвеннице неусыпная.

Радуйся, святая равноапостольная княгине Ольго богомудрая, свет веры православныя народу твоему предвозвестившая.

## **Кондак 12**

Благодать Пресвятаго Духа испроси нам, наставнице и духовная мати наша, вразумляющую и укрепляющую нас в деле спасения, да не бесплодно будет в нас всеянное тобою семя святых веры православныя, но да прозябнет и плод сторицен сотворит, имже

возможем напитати души наша для жизни вечныя, идеже вси святии вкупе с тобою воспевают ангельскую песнь Богу: Аллилуиа.

## **Икос 12**

Поюще твоя апостольския труды и многотрудное служение стране Российстей и Церкви Божией в просвещении народа твоего светом веры Христовы, славим и величаем укрепившаго тя Господа, ублажаем тя, яко молитвенницу нашу, восхваляем тя любовью и благодарственно воспеваем тебе сице:

Радуйся, со ангелы Пресвятей Троице предстоящая;

радуйся, о всех нас пред Пречистою Материю Господа предстательнице.

Радуйся, апостолом Христовым в служении поревновавшая;

радуйся, в лице святых благоверных княгинь земли Русския прославленная.

Радуйся, в сонме святых и праведных жен водворившаяся;

радуйся, со всеми святыми земли нашея хвалу Богу возносящая.

Радуйся, молитвеннице крепкая за Русь Православную;

радуйся, страны нашея духовное сокровище.

Радуйся, христолюбивому воинству необоримая споборнице;

радуйся, непоколебимо стояти за веру православную нас научающая.

Радуйся, в скорбех и страданиях наших скорая помощнице;

радуйся, по Бозе и Богородице крепкое наше упование.

Радуйся, святая равноапостольная княгине Ольго богомудрая, свет веры православных народу твоему предвозвестившая.

### **Кондак 13**

О святая равноапостольная Великая княгине Ольго, прими милостивно от нас хвалебное благодарение сие о всех, яже тобою воздаде Господь нам, отцем и праотцем нашим и всей державе Российстей, и моли Всеблагаго Бога умножити милость Свою на ны и на роды родов наших, утвердити ны в правоверии и благочестии, хранити же от всех напастей, бед и зол, да сподобимся с тобою, яко чада с материю своею, во веки воспевати Богу: Аллилуиа.

Этот Кондак читается трижды, затем Икос 1-й: «Ангелов и человеков Творец...» и Кондак 1-й: «Избранней от земли Русския...»

### **МОЛИТВА 1**

О святая равноапостольная Великая княгине Ольго, первоюгоднице Российская, теплая о нас пред Богом ходатаице и молитвеннице! К тебе

прибегаем с верою и молимся с любовью: буди нам во всем ко благу помощница и споспешница и якоже во временней жизни тщалася еси просветити праотцы наша светом святыя веры и наставити я творити волю Господню, тако и ныне, в небесней пребывающи светлости, благоприятными твоими к Богу молитвами, вспомоществуй нам в просвещении ума и сердца нашего светом Евангелия, да преспеваем в вере, благочестии и любви Христове. В нищете и скорби сущия утеши, бедствующим подаждь руку помощи, обидимыя и напастуемыя заступи, заблуждшия вразуми, и испроси нам у Всещедраго Бога вся благая и полезная в жизни временней и вечней, да тако благоугodne zde поживше, сподобимся наследия благ вечных в безконечнем Царствии Христа Бога нашего, Емуже со Отцем и Святым Духом подобает всякая слава, честь и поклонение всегда, ныне и присно и во веки веков. Аминь.

## **МОЛИТВА 2**

О великая угоднице Божия, богоизбранная и богославленная, равноапостольная Великая княгине ольго! Ты отринула еси зловерие и нечестие языческое, уверовала еси во Единого истиннаго Триипостаснаго Бога, восприяла еси святое крещение, и положила еси начало просвещению земли Российския светом веры и

благочестия. Ты еси духовная родоначальница наша, ты по Христе Спасителе нашем первая виновница просвещения и спасения рода нашего. Ты еси теплая молитвенница и ходатаица о отечестве нашем, воинстве и всех людех. Сего ради смиренно молим тя: призри на немощи наша и умоли Премилосердаго Царя Небеснаго, да не прогневается на ны зело, яко по немощем нашим по вся дни согрешаем, да не погубит нас со беззаконьми нашими, но да помилует и спасет нас по милости Своей, да всадит в сердца наша спасительный страх Свой, да просветит Своею благодатию ум наш, во еже разумети нам пути Господни, оставити стези нечестия и заблуждений, тщатися же во стезях спасения и истины, неуклоннаго исполнения заповедей Божиих и уставов Святыя Церкви. Моли, блаженная ольго, Человеколюбца Бога, да пробавит нам великую милость Свою, да избавит нас от нашествия иноплеменных, от внутренних нестроений, мятежей и раздоров, от глада, смертоносных болезней и от всякаго зла, да подаст нам благорастворение воздуха и плодоносие земли, да сохранит страну нашу от всех козней и наветов вражиих, да соблюдет в судиях и правителех правду и милость, да даст пастырем ревность о спасении пасомых, всем же людем споспешение, о еже усердно службы

своя исправляти, любовь между собою и единомыслие имети, на благо отечества и Святыя Церкви верне подвизатися, да возсияет свет спасительный веры в стране нашей во всех концах ея, да обратятся к вере неверующии, да упразднятся вся ереси и расколы. Да, тако поживше в мире на земли, сподобимся с тобою вечнаго блаженства на Небеси, хваляще и превозносяще Бога во веки веков. Аминь.

### **МОЛИТВА 3**

Величие наше и похвала еси, ольго богомудрая: тобою бо от лести идольския свободихомся и в веру Христову святым крещением уловихомся. Ты закона наставница чистая и веры Христовы учительница людем явилася еси. Приими убо похвалу от нас недостойных, пред честною твоею иконою покланяющихся и смиренно просящих, да твоими молитвами и заступлением от напастей и бед и печалей и лютых грехов свободимся: еще же и от будущих мук избави ны, честно творящая святую память твою и славящая прославльшаго тя Бога, во Святей Троице прославляемаго, Отца и Сына и Святаго Духа, ныне, и присно, и во веки веков. Аминь.



**ПОЛНЬІЙ  
АКАФИСТНИК  
КАНОНИЧЕСКІЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

І

НОВОЕ  
\* НЕБО